

2000 florin di multa y 2 siman di prison condicional exigi pa Booshi Wever

ORANJESTAD – Fiscal a condena totalmente e expresionnan cu señor Candelario Wever a haci den direccion di señor Rudy Lampe. Fiscal ta haya cu ta intencionalmente señor Wever a haci esaki y ta considera esaki un ofensa serio y cu ta tacha e bon imagen di señor Lampe. Esaki tabata basicamente e punto di bista di Fiscal den e caso penal cu a cuminsa contra señor Wever pa a yama señor Lampe pa pedofile.

OFENSA SERIO

Fiscal ta haya cu a tarda demasiado cu e caso aki cu ta causa incomunidad tanto pa Lampe como Wever. E ta contento cu e caso aki ta wordo trata y ta haya atencion di Hues. Fiscal ta lamenta cu Wever ta haci uso di silencio aunke cu esaki ta su derecho. E ta haya cu den tratamiento di e caso por a haya mas claridad kico a conduci Wever pa a haci e expresionnan aki. Fiscal a bisa cu e conoce Wever como un persona cu ta hopi fuerte den debate.

El a bisa cu ley ta muestra cu bo no por acusa y ofende

hende sin mas. Ley ta describi diferente forma. Un di nan ta tacha number di hende door di yama un persona pa algo. Tambe den ley ta menciona ofensa. Door di e expresionnan aki, Wever a ofende Lampe. Fiscal a bisa cu el a lesa e articulonan den corant, el a scucha e grabacionnan na radio, el a lesa Wever su declaracion na Landsrecherche. Tur esakinan segun Fiscal ta trec'e na e conclusion cu legalmente Wever a haci expresionnan cu e intension di tacha e bon number y honor di Lampe. El a bisa cu door di trece rumornan padilanti, bo ta haci bo mes culpable di tacha bon number y ofende Lampe. Esaki ta un ofensa hopi serio contra Lampe como politico y pastor. Fiscal ta haya e expresionnan ta un acusacion di cosnan concreto di abuso di mucha contra Lampe.

Fiscal ta considera e expresionnan di Wever inaceptabel. El a menciona ehempel di algun expresionnan cu tambe ta wordo considera como ofensa. Fiscal a bisa cu aki

tabata trata di un discusion entre dos politico den debate. E ta haya cu den un debate tin limite con mester papia cu otro. Como Parlamentario bo tin e inmunidad Parlamentario y libertad di expresion. Sinembargo si ta bay haci expresionnan ofensivo, e ora ey ta pasa e limitacionnan. El a muestra cu Wever a declara na Landsrecherche cu Lampe ta yam'e corrupto y e ora ey Wever ta yama Lampe pa pedofile. Fiscal ta haya cu esaki no ta hustifica pa Wever haci un acusacion asina serio contra Lampe. E ta haya cu Wever a tacha e bon number y honor di Lampe. Fiscal a bisa Hues cu nos ta biba den un comunidad catolico y expresionnan asina ta afecta Lampe hopi. E ta haya cu intencionalmente Wever a haci esaki.

DEBATE PUBLICA

Fiscal ta lamenta cu door di expresionnan asina ta dañá e debate publico den Parlamentario. El a remarca cu loke a sosode den Parlamento, con un mayor lo mester bay splica su yiu kico e expresionnan



Booshi Wever

di Wever ta. El a bisa cu e ta tene cuenta cu Wever a keda ripiti e expresionnan aki intencional.

MULTA Y CASTIGO CONDICIONAL

Fiscal a exige 2000 florin di multa y 2 siman di prison condicional. Ademá el

a exige como condicion special, cu Wever mester stop di haci expresionnan asina den direccion di Lampe. Pa loke ta e demanda di parti di Lampe, a base di un sentencia di 2008 di Hulanda, Fiscal ta haya cu mester reduci esaki na 25 mil florin pero ta laga esaki den man di Hues.

Booshi Wever ta reclama Fiscal den Corte

ORANJESTAD – Manera Bon Dia Aruba a publica, ayera mainta e caso penal cu Ministerio Publico a cuminsa contra Parlamentario Candelario Booshi Wever a tuma lugar. Den sala di Corte tabata presente Rudy Lampe cu su abogado mr. Flanegin, mientras cu Booshi Wever a wordo acompaña pa mr. Ruiz. Den e articulo aki, Bon Dia Aruba ta enfoca riba e critica cu Booshi Wever a haci riba Fiscal, mientras cu den otro articulonan ta publica e otro partinan di e caso. Di e forma aki, ta duna un cobertura amplio di e interesante caso aki y asina nos lectornan por saca nan mesun conclusion.

USO DI DERECHO DI SILENCIO

Ta asina cu for di comienso di tratamiento di e caso, Wever a bisa Hues cu e ta haci uso di su derecho di silencio pero kier haci uso di su derecho di ultimo palabra. Hues a bisa cu e ta respeta esey pasobra

esey ta derecho di un acusado cu mester presenta dilanti Hues.

Despues di a scucha Fiscal su exigencia y cu su abogado a hiba palabra, Wever a bisa Hues cu el a ripara cu Hues ta respeta su derecho di silencio pero Fiscal ta blo cuestiona esaki. Hustamente e kier a hiba un discusion den Parlamento riba e asunto di rumornan contra Lampe. Lampe a bay Corte pa laga un otro hende ta bay dicidi si e ta culpable of no. Desde cu Lampe a haci denuncia, Fiscal tabata fofo pa laga haci un investigacion. Ta Hof mester dicidi riba Fiscal. “Awor Fiscal ta bin cu un castigo asina pisa contra mi”, tabata expresionnan di Wever. Wever a sigui bisa cu tempo cu Lampe tabata yame como corrupto, e no por imagina cu esey tabata pa haci'e danjo. En particular e asunto di dump. Den Parlamento, Lampe tabata yam'e como corrupto. Wever a bisa Hues cu e ta

desmenti categoricamente cu el a haci expresionnan door di rabia contra Lampe. Awor ta tira culpa riba Wever cu Lampe lo no por haya trabou. Awor ta bisa tambe cu Obispo lo a bisa Lampe cu clero catolico ta for di regentenraad di hospital. Wever a bisa cu e no por kere cu Obispo a expresa esaki. E ta lamenta hopi esaki pasobra e no tabatin arte ni parte den e tumamento di decision aki. Segun Wever, e no a sigui tilda Lampe sino tabata reacciona riba preguntanan di prensa. Wever a enfatisa cu e no ta sinti cu e ta culpable. E ta haya cu el a haci un trabou como politico. El a bisa Hues cu su yiunan y su senjora tambe ta bira victima di politica.

Hues despues a sera tratamiento di e caso y a bisa cu e lo bay studia e caso y lo dicta sentencia 16 December pa 8.15 di mainta. Ta asina cu Wever na salida di sala di Corte, a duna Lampe un man.